



“Bibitakin kanon bong” ni kimototona:

Bwaa ni kabane aika a maiu n te aonnaba aio, a bon bane ni kainanoa kabuebuen taai bwa ana teimatoa ni maiu maiai. Kabuebuen taai are e roko n te aonnaba aio, e bon raumeaki bwa iai are e roko inanon ara aonnaba bwa ena kabonga-naaki ao iai ake a manga kaokaki rikaaki man ana raumea ara aonnaba ae e aranaki bwa “Te burangketi”. N arona aio, are e a kateimatoa te maiu n te aonnaba ae ti maeka inanon ngkai. Ma inanon te tai ae maan, ao e mwaiti kabonganaan taian bwaa (fuel) man rikiraken mwaitin te botannaomata ao are e a kaotinkoi taian kaeti nakon te eea aika a rang biotin ae e ataaki bwa n arana ae te Carbon dioxide, ereakin taian buakonikai ibukin nne ni maeka, te kateitei ao tabeua riki. N te aro aei are e a bon kakekerakea iai mwaitin te kaeti (gas) ae e biotin (poison) aio n te eea (air) are ti ikekenna ao n ara otabwanin ni kabuta. Te kaeti (gas) aio are ti bon aki kabonganaa bwa a bon tii kabonganaa taian aroka. Te kaeti aio bon iai ana konaa n taua te kabuebue n te tai ae maan, ai ngaia are man rikiraken mwaitin te kaeti ae Carbon dioxide n te eea ke n ara otabwanin, e bon karikirakea kabuebuen te aonnaba. Te kaeti aio bon iai ana konaa n urua te burangketi are ngaia te tia kabaeranta mwaitin te kabuebue are e roko ao are e kaokaki rikaaki.



E na kanga te kanganga ae Bibitakin kanon te bong n roota abara ae Kiribati?

Kiribati bon ngaia te aba teuana n te aonnaba ao n te aono ae Tebetebeke aika a rang kai rotaki ao man karako naba kaubwaia mai aon te aba ibukina bwa a rang n irariki ao man aki naba rangi raoiroi tanona ibukin te ununiki ao kai rotakin naba te ran ni mooii ibukina bwa a rang rinano.

Tabeua kanganga ake e a konaa n rotaki iai Kiribati man Bibitakin kanoan te bong bon:

- Rikiraken iabutin taari
- Kanakinakon mataniwiin te aba
- Rinnakon taari i aon te aba e roota te ran iaan te aba
- Maten taian ane i taari man bitakin kabuebuen taari
- Karakon uaan taian kai n amwarake man rikiraken tarikan te ran ao rikiraken te kabuebue
- Rikirake mwaitin te aoraki man rikiraken tarikan te ran ao mwaitin te bubu (dust) man te mwauteretere ao aki bwabwakan te karau
- Rikirake n tarika te ran
- Rikiraken kakangin taari e urua te ane ao man tiringii marin taari ake e oioi maiura maiai.



Tera ae e a tia n karaoaki n te aonnaba ibukin totokoan kanganga ake a riki man Bibitakin Kanoan Bong?

Te Kyoto Protocol bon ngaia te koranikaeti ke te kainibaire are e a tia n kateaki ao ni kaweneaki irouia aban te aonnaba ni kabane ake a kaain te boraraoi ae e aranaki bwa te UNFCCC (United Nations on Climate Change Convention). Te koranikaeti aio are ngaia ae ena iraki nanona ibukin kauarerekean mwaitin te kaeti ae biotin n aron te Carbon dioxide mairouia aba ake a bubura ao man kaubwai. Tiaki tii ngaia, ma iaan naba te boraraoi ae te UNFCCC, e bon kaungaaki te ikarekebai n mwakuri irouia aba nako ake a kaaina te boraraoi aio, bwa e na tieuataake te ibuokanibwai rinanon taian mwane ni buoka, anga reirei, kaka, ka-kaongoraa, tibwaan taian rabakau ao tabeua riki. Kiribati bon ngaia naba teuana te aba n te aonnaba are e kaaina te boraraoi aio ao bon iai naba kabaeana bwa ena ibuobuoki ibukin mwakurian nanon taian kainibaire ake a tia ni baireaki ni buakani kanganga ake a reke ke n riki man Bibitakin Kanoan Bong.



Tera ana kakamwakuri Aobitin Tararuan te Otabwanin ibukin kauarerekean te kanganga man Bibitakin Kanoan Bong?

Kiribati rinanon ana Aobiti ibukin Tararuan te Otabwanin, e a tia n katabangaaka ana kauoua n riiboti iaon tein Bibitakin Kanoan te Bong iaon Kiribati ni kabuta. Te riboti aio are e a bon kabobongaaki karaoana n ikarekebai ma ana rabwata te tautaeka aika a kakaokoro. Te riboti aio are ena bon konaa n riki bwa te bwai n mwakuri ke ni babaire ao man kataunaari iaon kawai ma anga n totoko ake ena konaa n kaka, ao n

ukoria te tautaeka ibukin buokan taian kanganga ake a irekereke ma Bibitakin Kanoan Bong.

Tabeua oin taben Aobitin Tararuan te Otabwanin rinanon mwananga are e tabe ma Bibitakin Kanoan Bong bon, katieuataakean te kaongoraa iaon Bibitakin Kanoan Bong bwa ena matata iai te botannaomata, karaoan taian riboti nakon boraraoi ake a a kaini Kiribati n te aonnaba ibukin karekean taian buoka mai tinaniku ao ai kawaran abamwakoron Kiribati n karaoan te kaka, ao tuoakin tein ana urubwai Bibitakin Kanoan Bong ibukin taian kakatauraoi iaon anga n ibuobuoki ake e a konaa te tautaeka n karekei mairouia aba mai tinaniku ma ai moara riki bon karekean ana boutoka te botannoamta ibukin te ikarekebai ni mwakuri ibukin kawakinan aia otabwanin ke aia enwaronmenta ma kanoana n aia abamwakoro nako aika a kakaokoro.

Anga n ibuobuoki ae ti konaa n karaoi ni buoka ni kauarerekea korakorān Bibitakin Kanoan Bong i Kiribati?

Ti kona n kauarerekea korakorān ana urubwai Bibitakin Kanoan Bong nakon abara man:

Kauarerekean te kamangeange ma te kabarekareka nakon te ran

- Unikan te tongo n totokoan kanakinanoan mataniwiw te aba
- Rinanon kakaongora ma waaki n anga reirei ni karikirakean te matata ao te oota irouia aomata n te aro bwa ena reke te boutoka ao te ibuobuoki mairouia.
- Kawakinan marin ara marawa ao aon te aba rinanon katanakin maan, aroka ao nneia ni maeka aika a bongana ao manga kabonganaan maange ake a konaa ni manga kabonganaaki aika a riai.



For more information, contact:
The Environment and Conservation Division
Ministry of Environment, Lands and Agricultural Development
PO Box 243, Bikenibue, Tarawa, KIRIBATI Phone: 28211, 28000, 28425 Fax: 28334
Email: info@environment.gov.ki Website: www.environment.gov.ki

